

MNF MOVEMENT-IN MIZO MIPUITE A |HA ZAWNGA A NGHAWNG DAN

Kum 1957-a Mizoram, khatih laia Lushai Hills-a Mautam intan chiah vel lai khan pawl pakhat Mizo Culture Society chu kum 1958 khan a lo ding a. He Mizo Culture Society hi Mizo National Famine Front tia thlak a niin Mautam tuar Mizo mipuite thlavang hauhtu pawl pawimawh tak a ni chhova. India sorkar in tam tuar Mizo mipuite a enkawl tha tawk lo nia hriatna lian tak leh India sawrkar laka vuivaina chuan Mizote rilru-ah hnam hmangaihna 'Mizo Nationalism' a rawn tuh nasa leh zual ta a ni.

Chu pawl Mizo National Famine Front chu kum 1961 khan Mizo National Front (MNF) ti a thlak a lo ni a. An hruai tu hmasa ber - President chu Pu Laldenga a ni a, an General Secretary chu Pu R. Vanlawma a ni. Mizo Culture leh nih phung bak ah Mizo mipui te chanvo dik tak sual chhuah chu a thupui ber a ni a. Pathian leh kan Ram tan tih chu an au hla ber a ni. Kum 1966 atang khan India ram sawrkar lak a tanga Mizote zalenna tura bein, lu chhum ban chhum huamin an che a, kum 20 tal tap heti ang a an chetna hian Mizo mipuite zingah a tha zawnga nghawng a ngah hle. He zalenna atan a an beihna kawngah hian ram leh hnam hmangaihtu mi tam tak in ram leh hnam tan an nunna hlu tak an hlan a, mipuiin an tuar nasa. Heti chhung hian Mizo mipuite hian ram leh hnam himna tur movement hi an thlawp tha hle a, tawrhna leh harsatna tamtak karah pawh hma lam eng thlirin chu hun chu an paltlang a ni.

Movement an beihlai a nasa tak a a tha lam zawng a Mizo mipuite min fuih harh piah lamah India sorkar nena inremna siam a nih a, Peace Accord an ziahah khan nakin zel a kan ram leh hnam tana thil tha tam tak ziah lan a nia, heng te hi tih hlawhtlin a nih a, a taka kan chhawr zel a nih chuan MNF movement kha Mizoram hian kan la chhawr zel dawn tih hi phat rual a ni lo.

Mizo National Front Movement hian Mizo mipuite zingah a tha zawnga nghawng tamtak a neihte zinga thenkhat han sawi ila:-

MNF Movement hian Mizo Culture humhim leh ngaihsanna a rawn hring chhuak a ni. Mizo National Front hian Mizote chu Culture nei tha leh hnam dangte pawhin entawn tlak nun an neihzia a rawn pho lang a. Tlawmngaihna (midangte tana thil tha tih phut leh neih miah lovin) an ken chhoh dante hi Mizo zingah a rawn chawi sang leh zual. China ram pana kan Mizo pasalthate an kal a, an inpekzia leh tlawmngai taka an thiante an enkawl chhoh dan kha an kalkawng hnam hrang hrang awmte leh Chinese-te ngei pawhin Mizo chu hnam rinawm, thutiam a ding nghet leh thian chhan thih ngam an nihzia an hmuh phah a ni. He mi kawngah hian, India sawrkar pawhin hre Chiang em emin Mizote chu sang takah min dah a ni. Mizo nihna rilru put lenna hian kan hnam zia leh nunphung chawisan na nasa tak in a hring lo thei lova, Inremna Thuthlung (Peace Accord) an ziahah pawh khan Mizo culture vawnhim leh chhawm zui zel tih an ziak lut khan India danpui hnuaiah Mizo culture humhimna leh chawisan zelna a kawh Chiang hle a. Hei hi MNF movement-in a hrin chhuah chang ni lovin a humhalh na kawng an thawh ropui zia a entir a ni.

He movement hna thawh ropui leh pawimawh tak dang leh chu Mizo mipui zingah mahni ro inrel duhna a rawn siam hi a ni. Mizo National Front Movement hian Mizo mipuite duh dan leh Pathian rawn chung zel a kan ram kalsiam a pawimawh zia a rawn chawi nung a, hei hian Mizo te zing ah mipui duhdana rorelna pawimawh zia leh rorelna kawng a mimal chanpual bik chin mumal taka then hran a tul zia a rawn ti lang. British sawrkar hnuaia Mizote kan awm atangin tun hma a lal rorelna, fel fai tha tak kha a bo lo thei tawh lova, rorel tu mumal tak kan awm tak loh a vangin

mipui rorel na (Democracy) chu kan lo hmehhriat chho ta a, chu rorelna kalphung-khawvel ram tamzawkin inrorelna atana an hman chu keini mizo te pawhin kan lo hman tan ve ta a. District Council, Union Territory leh State kan lo nih chhoh tak bakah tunah chuan Village Council Court te, Local Council Court leh Municipal Council thlengin inrelbawlna tha zawk kan nei chho ta zel a, hei hi MNF Movement-in a rawn hrin chhuah zel a ni tiin a sawi theih ang.

Mizo National Movement hian khawvel ah Mizote kan hniam bik lohzia a rawn pholang bawk. Nung taka Nationalism rilru rawn keng chhoin khawvel hmun hrang hrang a mite zing ah Mizote harsatna leh manganna te chu a pholang a. An theih ang tawk tawkin Mizote dinhmun chawisan an tum a. Hnamdangte zing ah kan tlangnel lohva kan zum an hlauh a vang in hnam dang aiin kan hniam bik lo tiin Mizote chu nasa takin in min fuih thin a. Ram hruaitute pawhin Mizo thilsiam te an theih ang ang a chawilar in, state danga hruaitu rawn tlawh thinte an lo pek thin na hian rah tha a chhuah mek zel in a la chhuah dawn chauh a ni. Mizote kan themthiam ziate leh kan taihmak ziate chu state dang ten an lo hmuh theih nan nasa takin hma an la mek zel a. Tin, Mizoram leilung hausaknate chu humhim kawngah leh zawn chhuahna lamah hma an la bawk.

Mizo National Movement-hian mahni inrintawkna Mizo mipuite zingah a pholang bawk. Mizote hi duhlo chung a hnam awp chi an nih lohzia leh hnam ropui khawvel pawha hriat hlauh hnam rinawm leh Pathian tih mi kan ni tih a rawn tar lang. Kan pi leh pute hun a tang renga midang thuhnuai a awm ngai thei lo kan ni a, British sawrkar a lo len hnuah pawh lal tamtak chu an tlawm duh lo a nih kha. Mahni inrelbawlna chu tha tawh, fel tawh leh a aia tha awm lova ngai lalte khan nasa takin mipuia mahni inrintawkna leh induh tawkna rilru an lo tuh tawh a ni. He thila sawihmaih hauh loh tur chu kan Mizo Pasaltha ten MNF hnuai a mumal taka Mizo National Army an din pawh a an chhinchhiaha hrang hrangah Kraws an hmangete kha hnamdang in ropui an ti in Mizote min ngaihsan pah hle. Mizo mipuite chu mahni hnam thatnan a ding chhuak ngam tur leh mahni ngaihdan sawingam turin inrintawkna tha tak an rilruah an tuh. Anmahni ngeiin an duh angte sawitheihna tur, an duhzawng hruaitu turte leh an ram leh hnam kaihhruai a nihna tur ah mipui te chuan mawhphurhna tamtak a nei tih Mizo National Movement chuan hriain Mizo mipuite an inrintawk theih nan a fuih thin.

He movement hian diklo taka in awpbah leh inenkawl hi Zofate duhdan a ni ngailo tih a rawn pholang chauh ni lovin tun thleng in he rilru hi min la puttir. Mizo National Front Movement hian eng sawrkar pawh nisela, a ramneitute hmangaih lo leh ngaihven duh lo chu Zofaten an duh ngai dawn lo a ni tih pholangin a tul a nih phei chuan an nunna hial chan pawh huamin awpbahna diklo chu an dodal ngam zel dawn ani tih a tilang. Mizote hian hmasang atang tawhin thil dik lo leh a nihdan tur ni lo te hi an lo ngaimawh thin em em a. Chu chu tun thleng hian mi tam zawk rilruah a la bet reng a. India sawrkar hnuai a Mizote hian kan chan tur leh kan chanvo tamtak chang lova inhriatna kan nei lian hle a, hnamdang te lakah thliarhran leh hnuai chhiaha inhriatna rilru kan nei lian hle bawk a, heti anga diklo taka inawpbahna hi Mizo mipuiten an la na em em mai a. Zofate dikna chanvo duh avangin Mizo tlangval tamtak in an nunna an lo chan tawh a ni. Mizote hi mahni dikna hre tak leh chanvo dik tak chan tum tlat mi kan ni a. Chuvang chuan 'dik lo taka inawpbah leh inenkawl' te chu Mizo mipuiten an huain chumi do letna atan chuan MNF movement hi a lo chhuak ta a ni.

MNF Movement hian Mizote hmun hrang hranga awm insuihkhawm nan hma a la hmasa ber a, a la nasa ber bawk. MNF thupui Nationalist Movement hian hmun hrang hrang- Burma, Bangladesh, Tripura, Manipur, Assam, Nagaland etc.-a Zofa chengte chu lungual taka Mizo Nationalist Feeling neih tirin Zofa te chu hmun khata in chhunkhawmna tura hmala hmasa bertu leh chawilar bertu a ni ta zel a ni. Tin, Zofate hmun hrang hrang a awmte pawh in ngaihven em em

in an insuihkhawm theih nan hma nasa takin an la a. Kan Zofate rampawna awmte pawhin lungual tak leh inngeih takin an awm phah a. Kha Movement kha hmun hrang hranga Zofate, rilru leh thlarau a thuikhawmtu pawimawh tak a ni tih hi phat rual ani lo. Tin, Mizo nationalist movement avang khan khawvelin Mizote min hriat phah a, hei hian hmun hrang hrang a Mizo awmte a tiphurin an rilru a chawisang hle. Hmunkhatah cheng ho vek thei lo mah ila mahni awmna hmuna Mizo nih chu a nuam an ti a, inchhuanna leh vannei intihna rilru a pe lian hle a ni.

He Movement hlutna leh pawimawh na dang leh chu Pathian duh dana rorelna leh Pathian tih pawimawhzia a ti lang hi a ni. Mizo National Front Movement hruaitute kha Pathian tih a, Pathian kaihhruai na tel lova ramn hma a sawn theih lohzia hrechiang em em tu, engkima Pathian dah hmasa ber leh an thiltih a pianga Pathian rawn chung zela tih duhna nun neitu an ni. Kum1986- a India sawrkar nen a inremna thuthlung an lo ziah theihna chhan pawh kha Pathian hnena t awngtai a, Kohhran leh he Movement buaipui tu tena mipui leh ram duh dan chu Pathian duh dan a ni tih an pawm tlat vang a ni.

Mizo National Front Movement vek hian Mizote chu hnam rinawm, taima leh thawhpui tlak an ni tih a rawn pho chhuak. He movement an beih laia ramdang sipaite leh hnamdang te nen a an thawhho laipawhin Mizote chu hnam rinawm kan nih zia tilang in inpalaitawna leh intanpui tawna kawngah pawh sawrkar lian zawk te rin an hlawh a ni. Ralthuam nei lovin, ei leh bar hmuh loh chang ngah mahse huaisen tak a ram leh hnam tana thawk an ni a, an zinga hnamdang awm ve zauhte pawh in hahipin hnam sipaite rinawm zia leh huaisen zia hi an sawi thin a ni. Ral an mante pawh hnamdang leh an mahni thah tuma pel tu India sipaite mak tih khawpa an chungah zahngaihna lantir thin an ni a, an that a nih pawh in rawng taka thah emaw, nghaisak emaw an nei ngai lo an ti thin. Tin, sawrkar dang thurualpui an neihte tan pawh rinawm leh thataka an inremna siam sa chu bawhzui mai thin an ni a. Hei hian MNF pasalthate nun atangin Mizote hi hnam rinawm leh inthural an ni tih nasa takin hnam dangte mitah a pholang a ni. Kha Movement beih a nih lai a rammu ve lo te zingah ram leh hnam chhana mi tamtak thihnte kha Mizote rinawmna leh inlungualna entirtu tha tak a ni bawh. Mahni theihna zawn zawn ah, ramtana rammu pasalthate tan an thawk ve a, an hum a, an chawm a, an thih aiin an thi ti hial pawhin a sawi theih ang. Chuti ang tak a thukhat vua chu Mizo hnamte hi kan ni tih a ti lang a. Chu rilru vek chu tun thleng pawh in kan la pu a ni. Tun ah hian Politics a vang te, sakhuana a vang leh thil dang dang a vangin inlungualloha leh inkhinna nei zauh zauh thin mah ila MNF movement thuken Mizo Nationalism-ah hi chuan thukhat kan la vaw tlang reng hi he movement hlawhtlin na leh a nghawng pawimawh tak a ni.

Heng bakah hian Mizo National Front movement-in Zoram tana a thawh pawimawh leh hlu tak tak sawi tur a la awm ngei ang. Mahse, sawivek sen a ni lova, kan hmuh tawh bakah kan la hmuh leh zeltur hmasawna zawng zawng hi hnam humhalhna kawnga hma lakna ropui tak rahchhuah ani tih phat rual a ni lo. Chuvangin, Mizote hian kawng tinrengin MNF movement hi kan chhawr a, kan hlawkpui a, kan tangkaipui chho mek zel a nih tih hi thu dik, a taka kan hmuh chhoh zel tur a ni.

*(Hei hi MNF Golden Jubilee puala Essay inziahsiaka a Category -III, Sikul zirilaite tan bika inelna a pakhatna hauhtu **Christina Malsawmkimi, Pang** Class VIII, Mt. Carmel School zia a ni- 2011)*